

讀

書

叢

錄

讀書叢錄卷七

臨海洪頤煊

齊論多二篇

何晏論語序齊論有問王知道多於魯論二篇古論亦無此二篇頤煊案王應麟困學紀聞謂問王是問王之譌說文引論語自敘稱古文玉部璫字注引逸論語曰玉粲之璫今其璫猛也瑩字注引逸論語曰如玉之瑩以其不在古論篇中故稱爲逸是亦古論無此二篇之證

兩子張

序又云古論分堯曰下章子張問以爲一篇有兩子

張凡二十一篇頤煊案漢書藝文志論語古二十一
篇有兩子張如淳曰分堯曰篇後子張問何如可以
從政已下爲篇名曰從政其篇名不與班志同者當
是俗間改本堯曰二章不知命章釋文魯語無此章
據何晏序古論亦當無此章

○ 有朋自遠方來

學而有朋自遠方來釋文有或作友非阮尙書校勘
記曰虎通辟雍篇引朋友自遠方來又鄭氏康成注
此云同門曰朋同志曰友是舊本皆作友字頤煊案
文選陸機挽歌友朋自遠方李善注引論語爲證有
亦當作友

其諸

其諸異乎人之求之與頤煊案公羊桓六年傳其諸以病桓與閔元年傳其諸吾仲孫與僖二十四年傳其諸此之謂與宣五年傳其諸爲其雙雙而俱至者與十五年傳其諸則宜於此焉變矣其諸是齊魯間

語

○未若貧而樂

未若貧而樂頤煊案皇侃本山井鼎考文史記仲尼弟子列傳文選幽憤詩李善注引樂下皆有道字集解鄭曰樂謂志於道魯論樂下無道字孔曰能貧而樂道又曰往告之以貧而樂道古論樂下有道字

三十而立

爲政三十而立頤煊案漢書藝文志古之學者耕且
養二年而通一藝存其大體玩經文而已是故用日
少而畜德多三十而立也三國志孫皎傳孔子
言三十而立非但謂五經也皇侃論語義疏古人三
年明一經從十五至三十是又十五年故通五經之
業所以成立皆漢魏論語家說

繪事後素

八佾繪事後素釋文繪本又作績頤煊案古論作繪
說文繪會五采繡也論語曰繪事後素从糸會聲魯
論作績集解鄭曰繪畫文也凡畫繪先布衆色然後

以素分布其間以成其文字當作績考工記凡畫績之事後素功鄭注素白采也後布之爲其易漬汙也不言繡繡以絲也鄭司農說以論語曰績事後素卽其證

示諸斯

其如示諸斯乎指其掌集解包曰孔子謂或人言知禘禮之說者於天下之事如指示掌中之物言其易了頤煊案禮記中庸治國其如示諸掌乎鄭注示讀如寘諸河干之寘寘置也物而在掌中易爲知力者也包注指示二字連文義不可通當從鄭注爲正

鄰人之子

或曰孰謂鄆人之子知禮乎邢昺疏古謂大夫守邑者以邑冠之呼爲某人孔子父鄆邑大夫左傳稱鄆人紇故此謂孔子爲鄆人之子也左傳成二年云新築人仲叔于奚杜注云于奚守新築大夫卽此類也頤煊案左氏文十五年傳卞人以告杜預注卞人魯卞邑大夫昭九年傳周甘人與晉閻嘉爭閻田杜預注甘人甘大夫襄也二十一年傳厨人濮曰杜預注濮宋厨邑大夫皆是

擇不處仁

里仁擇不處仁困學紀聞載張衡思立賦注引論語宅不處仁謂古文本作宅頤煊案集解鄭曰求居而

不處仁者之里則不得爲有知擇不訓求鄭當從古文作宅

參乎

子曰參乎釋文參所金反九經字樣參參上說文下隸省與參字不同參音驂從叺今經典相承通用參頤煊案說文森字注从林从木讀若曾參之參則讀作驂音者非

申棖

公冶長或對曰申棖邢疏鄭云蓋弟子申續史記云申棠字周家語云申續字周頤煊案棠棖聲相近爾雅釋詁廢續也說文續古文作廢故申棠又譌作申

續皆是一人

足恭

巧言令色足恭集解孔曰足恭便僻貌邢疏便僻其足以爲恭謂前却俯仰以足爲恭也一曰足將樹切成也謂巧言令色以成其恭頤煊案大戴禮曾子立事篇足恭而口聖足與口對言之當以前說爲正漢書趙敬肅王傳彭祖爲人巧佞卑諂足共師古曰共讀曰恭足恭謂便僻也亦從前說

申申天天

述而子之燕居申申如也天天如也集解馬曰申申天天和舒之貌頤煊案申古通作伸字儀禮士相見

禮君子欠伸鄭注志倦則欠體倦則伸說文天屈也
言燕居之時其容體可以屈伸如意

吾不復夢見周公

久矣吾不復夢見周公釋文本或無復字非臧氏琳
經義雜記據陸氏所見本知經無復字乃後人援注
所增以經云久矣吾不夢見先時曾夢見故注云不
復夢見復字正釋久矣字陸氏反以無復字爲非不
審之至頤煊案文選劉琨重贈盧諶詩吾衰久矣夫
何其不夢周劉所見本亦當無復字

舉一隅

舉一隅皇侃本子孟蜀石經文選西京賦李善注引隅

下俱有而示之三字頤煊案集解鄭曰說則舉一隅以語之鄭本亦當有而示之三字

憇

泰伯慎而無禮則憇頤煊案說文無憇字方言慎憂也又云慎思也凡思之貌亦曰慎憇卽思字文選魏都賦誰勁捷而無憇李善注論語曰慎而無禮則憇憇與憇同

空空如也

子罕有鄙夫問於我空空如也皇侃疏空空無識也釋文鄭或作恠恠頤煊案上篇恠恠而不信包注恠恠也呂氏春秋下賢篇空空乎其不爲巧故也高

誘注空空懋也大戴禮王言篇工璞商懋女懂婦空空空空亦懋也皆與恠恠字通用

恠恠如也

鄉黨恠恠如也頤煊案史記孔子世家其於鄉黨恠恠似不能言者索隱有本作逡逡隸釋祝陸後碑鄉黨逡逡朝廷便便與索隱所見本同劉脩碑其於鄉黨逡逡如也史記李將軍列傳李將軍悛悛如鄙人漢書作恠恠並字異而義同

○居不容

居不容唐石經容作客釋文客本或作容頤煊案集解孔曰爲室家之敬難久大戴禮衛將軍文子篇在

貧如客說文窓敬也皆謂客爲敬則作居不客本是
。若由也不得其死然

先進若由也不得其死然皇侃本若上有曰字頤煊
案漢書敘傳小顏注引論語作子樂曰若由也不得
其死然與皇侃本同此句本別爲一章曰上當脫子
字文選幽通賦崔子玉座右銘李善注引皆作子曰
若由也不得其死然或謂樂卽曰字之譌非也

屢空

回也其庶乎屢空頤煊案史記伯夷列傳回也屢空
糟糠不厭後漢書賈逵傳此子無人事於外屢空則
從孤竹之子於首陽矣焦贛易林衡門屢空使士使

意皆作空乏之空漢書鮑宣傳唐尊衣敝履空北堂
書鈔卷二十八會稽典錄徐弘爲右扶風都尉衣弊
屨空空穿也屨屨古字通用

使子羔爲費宰

子路使子羔爲費宰頤煊案史記仲尼弟子列傳費
下有郈字論衡藝增篇子路使子羔爲郈宰左氏定
十二年傳仲由爲季氏宰將墮三都於是叔孫氏墮
郈季氏墮費子路之使子羔當在此時或費或郈擇
一使之故史記並書之

吾得而食諸

顏淵吾得而食諸山井鼎考文古本吾下有豈字頤

煇案皇侃本史記孔子世家漢書武五子傳小顏注引皆吾下有豈字釋文出吾焉得而食諸云本亦作焉得而食諸釋文正文焉字當是豈字之譌

直躬

子路吾黨有直躬者釋文鄭本作弓云直人名弓頤煇案呂氏春秋當務篇異哉直躬之爲信也淮南汜論訓直躬其父攘羊而子證之高誘注直躬楚葉縣人也誘虛植門人植與鄭同師馬融故誘亦以直人名躬與鄭注同廣韻直又姓楚人直弓之後非是

溝瀆

憲問自經於溝瀆頤煇案史記齊太公世家遂殺子

糾於笙瀆集解賈逵曰魯地句瀆也索隱按鄒誕生
本作莘瀆莘笙聲相近論語作溝瀆左氏襄二十一
年傳執公子買於句瀆之丘句瀆卽溝瀆也

其言之不怍

其言之不怍頤煊案大戴禮曾子立事篇盧辯注引
論語曰其言之不怍作當通作恁字荀子儒效篇無
所疑恁楊倬注恁與怍同

好行小慧

衛靈公好行小慧釋文魯讀慧爲惠今從古頤煊案
文選陳孔璋檄吳將校部曲說誘甘言懷寶小惠李
善注論語曰好行小惠從魯讀皇侃本慧作惠是假

借字

友便辟

季氏友便辟惠氏棟論語古義馬鄭皆讀辟爲譬謂巧爲譬諭以求容媚徐彥曰今世間有一論語音便辟爲便僻者非鄭氏之意通人所不取矣頤煊案家語入官篇邇臣便僻者羣僕之倫也王肅注僻宜爲辟公冶長巧言令色足恭孔注足恭便僻貌當是古論作僻字

巧言章

陽貨子曰巧言令色鮮矣仁山井鼎考文古本足利本無此章頤煊案唐石經此章先無而後添注蔡邕

石經陽貨篇末題云凡廿六章今集解本此章在內
共廿四章似蔡邕石經僅分子曰唯上知與下愚不
移子謂伯魚曰女爲周南召南矣乎各自爲一章故
云廿六太平御覽卷三百八十八引論語陽貨曰巧
言令色鮮矣仁是漢魏舊本皆有此章後人刪之非
也

滔滔者

微子滔滔者天下皆是也顧煊案滔滔當作惛惛魯
論作惛惛古論作悠悠文選幽通賦溺招路以從已
兮謂孔氏猶未可安惛惛而不艱兮卒隕身乎世禍
曹大家注惛惛亂貌漢書敘傳小顏注引論語惛惛

者天下皆是也釋文滔滔鄭本作悠悠史記孔子世家亦作悠悠集解孔安國曰悠悠者周流之貌也孔鄭皆從古文文選養生論夫悠悠者既以未效不求李善注引論語爲證字當作悠悠今本作滔滔者是後人改

植其杖而芸

植其杖而芸釋文芸音云多作耘字芸香草也頤煊案蔡邕石經文選應休璉與從弟書李善注太平御覽卷七百十引論語皆作耘耘說文作賴或作耜芸卽耜字之省

孝經分章

孝經正義諸家疏並無章名而援神契自天子至庶人五章唯皇侃標其目而冠於章首頤煊案漢書匡衡傳大雅曰無念爾祖聿修厥德孔子著之孝經首章抱朴子仁明篇唐堯以欽明冠典仲尼以明義首篇此亦孝經有章名之證

仲尼居

開宗明義章仲尼閒居頤煊案釋文據鄭康成本作仲尼居說文據古文孝經引作仲尼尻三國志張昭傳孫權問衛尉嚴畷寧念小時所聞書不畷因誦孝經仲尼居南齊書文惠太子傳引孝經仲尼居顏氏家訓書證篇仲尼居二字之中兩字非體三蒼尼旁

益丘說文居下施几皆無閒字

孝無終始

庶人章故自天子至於庶人孝無終始而患不及者未之有也正義鄭曰諸家皆以爲患及身今注以爲自患不及將有說乎荅曰經傳之稱患者多矣皆是憂惡之辭惟蒼頡篇謂患爲禍孔鄭韋王之學引之以釋此經頤煊案禮記大學物有本末事有終始祭義終始相巡以致天下之和孝無終始者非孝也故禍患及之此戒之之辭

孟子七篇

史記孟軻列傳退而與萬章之徒序詩書述仲尼之

意作孟子七篇頤煊案風俗通窮通篇退與萬章之徒序詩書仲尼之意作書中外十一篇太史公所見孟子止七篇外四篇是後人所益

受業子思

孟軻列傳受業子思之門人索隱王劭以人爲衍字頤煊案漢書藝文志孟子名軻子思弟子風俗通窮通篇孟軻受業於子思列女傳母儀篇孟子師事子思遂成天下之名淮南汜論訓高誘注孟子受業於子思之門詩正義引譜云孟仲子者子思弟子蓋與孟軻共事子思後學於孟軻皆不以孟子受業子思之門人

孟子注

隋書經籍志孟子七卷鄭玄注頤煊案史記五帝本紀堯知子丹朱之不肖索隱鄭玄云肖似也不似言不如人也疑卽孟子注又燕世家王因收卬而效之子之索隱鄭玄云效呈也以卬呈與子之平原君列傳毛遂曰使遂蚤得處囊中乃穎脫而出索隱鄭玄云穎環也平原君竟與毛遂偕十九人相與目笑之而未發也索隱鄭玄云皆目視而輕笑之未能卽廢弃之也又趙世家王夢見處女鼓琴而歌一段集解兩引綦母邃曰綦母邃亦注孟子豈皆孟子逸篇文

邪

塗有餓莩

梁惠王上塗有餓莩趙岐注餓死者曰莩詩曰莩有梅莩零落也頤焯案漢書食貨志引孟子作野有餓莩依說文字當作受爾雅釋詁徂落死也注以餓死爲零落其義一也

制梃

可使制梃以撻秦楚之堅甲利兵矣趙注制作也頤焯案制古通作折字論語顏淵片言可以折獄者鄭注魯讀折爲制折斷也斷梃言其易後漢書鄧禹傳帝敕曰赤眉東來吾折捶笞之亦其證

疾視

梁惠王下夫撫劔疾視曰彼惡敢當我哉趙注疾視惡視也撫劔瞋目曰人安敢當我哉頤煊案下文則疾視其長上之死而不救疾視不爲瞋目疾視當是仄視之譌漢書賈誼傳令天下仄目而視師古曰仄古側字

極所也

民以爲將拯己於水火之中也趙注極所也宋本所作濟毛本作掇頤煊案所當是拊字之譌說文拊上舉也从手升聲易曰拊馬壯吉今周易作拯馬拊所字形相近

吾不憚焉

公孫丑上吾不憚焉趙注憚懼也音義丁本作邁頤
煊案丁本作邁是也此言自省而不直雖褐寬博之
人吾不敢輕往以敵之若自省而直雖千萬人吾往
矣文義相對易損卦己事邁往則邁亦往也

壹

志壹則動氣氣壹則動志也趙注孟子言壹者志氣
閉而爲壹也頤煊案說文壹作壺从吉从壺壺不得
溥也是閉塞之義

汗

汗不至阿其所好趙注汗下也言三人雖小汗不平
亦不至阿其所好以非其事阿私所愛而空譽之頤

煊案汗通作于禮記文王世子况于其身以善其君
乎鄭注于讀爲迂迂猶廣也大也經典凡從于之字
多訓爲大此言三子言雖大而非阿其所好下文所
陳是大之辭

阨窮而不憫

阨窮而不憫趙注憫懣也頤煊案憫當作憫廣雅釋
詁懣懣也說文悶懣也憫卽悶字之俗易乾卦遯世
无悶不見是而无悶義正與此相同

宿於晝

公孫丑下孟子去齊宿於晝趙注晝齊西南近邑也
頤煊案水經淄水注孟子去齊三宿而後出澶澶水

出時水東去臨淄十八里所謂澆中也史記田單列傳燕之初入齊間畫邑人王蠋賢集解劉熙曰齊西南近邑畫音獲是劉熙孟子注本作宿於畫趙注與劉注同字亦當作畫今本作畫是傳寫之譌

悻悻然

悻悻然見於其面音義字或作慳慳然頤煊案說文無悻字說文慳恨也趙注論曰悻悻然小人哉卽論語慳慳然小人哉趙所見本或作慳慳然故引以爲證

蠅蚋姑噉之

滕文公上蠅蚋姑噉之趙注噉相共食之也頤煊案

左氏僖二十八年傳楚子伏已而監其腦杜預注監
唳也監與姑古字通用禮記內則姑與之而姑使之
鄭注姑猶且也方言監且也郭璞注監猶唳也義亦
相同

憮然

夷子憮然爲問曰趙注憮然猶悵然也頤煊案文選
東京賦憮然有間薛綜注愕然有頃論語微子夫子
憮然曰皇侃疏憮然猶驚愕也

范氏

滕文公下吾爲之範我馳驅音義範我或作范氏頤
煊案文選東都賦范氏施御李善注孟子曰吾爲之

範我馳驅宋本文選注引孟子亦作范氏趙注範法也本作範我古字從竹從艸多通用范卽範字氏卽我字之譌

洚水

書曰洚水警余洚水者洪水也頤煊案此與告子下兩稱洚水者洪水也皆釋書洚水爲大水洚讀如洪今尙書大禹謨作降水儼子傳水性流下故曰降水其音義並失矣

遷於負夏

離婁下遷於負夏頤煊案遷讀如懋遷有無之遷史記舜本紀就時於負夏索隱就時猶逐時若言乘時

射利也卽此所謂遷徙物貨於負夏之地以相貿易正義以爲遷居失之

微也

子思臣也微也趙注微少也正義其勢則微小也當赴君之難不可去也頤煊案微當訓職說文職記微也與此微字義正相同說文微幟也左氏傳杜預注作徽識也皆同聲假借字

施施從外來

施施從外來趙注施施猶扁扁喜悅之貌頤煊案上文施從良人之所之趙注邪施而行詩北風其虛其邪爾雅釋訓作其虛其徐施施卽徐徐也丘中有麻

將其來施施毛傳施施難進之貌鄭箋施施舒行皆是徐義

九男

萬章上帝使其子九男頤煊案呂氏春秋去私篇堯有十子不與其子而授舜高誘注孟子曰堯使九男二女事舜此云十子殆丹朱爲亂子不在數中

謨蓋

謨蓋都君咸我績趙注謨謀蓋覆也頤煊案爾雅釋言蓋割裂也釋文蓋舍人本作害禮記緇衣鄭注割之言蓋也割字從害謨蓋猶言謀害也趙注失之

鬱陶

鬱陶思君爾忸怩趙注我鬱陶思君故來爾辭也忸怩而慙是其情也正義我氣閉積思意君故來頤煊案爾雅釋詁鬱陶喜也禮記檀弓人喜則斯陶鄭注陶鬱陶也樂緯稽耀嘉武王克殷之後民乃大安家給戶足酌酒鬱搖鬱搖卽鬱陶皆喜之之辭

接浙而行

萬章下接浙而行頤煊案說文澆浚乾漬米也从水竟聲孟子曰夫子去齊澆浙而行荀子仲尼篇可炊而饒也饒卽澆字澆接因字形相近而譌

先簿

孔子先簿正祭器音義丁步故切本多作薄誤頤煊

案隸釋夏承碑爲主薄督郵韓勅碑陰主薄魯薛陶
武榮碑郡曹史主薄古簿字皆作薄

生之謂性

告子上生之謂性頤煊案禮記樂記則性命不同矣
鄭注性之言生也論語公冶長夫子之言性與天道
何晏注性者人所受以生者也皇侃疏性生也白虎
通情性篇性者生也莊子庚桑楚性者生之質也荀
子正名篇生之所以然者謂之性漢儒言性皆同此
說

知生於憂患

告子下然後知生於憂患趙注故知能生於憂患音

義云丁依注音智注同陸如字頤煊案荀子榮辱篇
楊倞注引孟子曰智生於憂患與上文增益其所不
能皆後人依注義改之

盜於背

盡心上睥然見於面盜於背趙注盜視其背而可知
鈕氏樹玉說文新附攻盜與見對是盜義近映頤煊
案詩北山或王事鞅掌鄭箋鞅猶何也盜於背猶言
如負何於背也

拔一毛

揚子取爲我拔一毛而利天下不爲也頤煊案列子
楊朱篇禽子問楊朱曰去子體之一毛以濟一世汝

爲之乎呂氏春秋不二篇高誘注孟子曰陽子拔體
一毛以利天下弗爲也明理篇高誘注陴脚也音楊
子愛骭一毛之骭拔下當有體字骭卽體字之別淮
南倣真訓雖以天下之大易骭之一毛無所槩於志
也韓非子顯學篇不以天下大利易其脛一毛義亦
當有體字

讀書叢錄卷八

臨海洪頤煊

爾雅舍人注

釋文序錄爾雅有犍爲文學注三卷一云犍爲郡文學卒史臣舍人漢武帝時待詔頤煊案文選羽獵賦李善注引作郭舍人西京雜記郭威字文偉茂陵人好讀書以謂爾雅周公所制而有張仲孝友張仲宣王時人非周公之制明矣疑卽此人

孫炎爾雅疏

宋史藝文志孫炎爾雅疏十卷邢昺爾雅疏序其爲注者則有犍爲文學劉歆樊光李巡孫炎雖各名家

猶未詳備惟郭景純最爲稱首其爲義疏者則俗間有孫炎高璉皆淺近俗儒不經師匠頤煊案此作疏之孫炎與作注之魏孫炎叔然別是一人陸佃埤雅屢引孫炎爾雅正義卽俗間所行義疏本

艘至也

釋詁艘至也釋文艘郭音届孫云古届字頤煊案詩節南山正義引釋詁届至也張參五經文字艘爾雅或作届音戒至也郭璞注引方言宋曰届可證郭本作届

緜善也

緜善也郭注未詳頤煊案禮記曲禮上急繕其怒鄭

注繕讀曰勁周禮夏官繕人鄭注繕之言勁也善也
緜勁聲近說文緜止也从糸林聲讀若郴方言自關
而西秦晉之間凡物之壯大者而愛偉之謂之夏周
鄭之間謂之假郴齊語也義亦與善相近

漠謀也

漠謀也邵氏晉涵正義詩疏引舍人云漠心之謀也
頤煊案詩巧言聖人莫之毛傳莫謀也釋文莫本又
作漠

順陳也

順陳也郭注未詳頤煊案儀禮士冠禮洗有篚在西
南順鄭注篚亦以盛勺解陳於洗西特牲饋食禮及

兩劔芼設于豆南南陳南陳卽南順也鄉飲酒禮篚
在洗西南肆肆亦陳也

尸案也

尸案也郭注謂案地案官也郭注官地爲案頤煊案
案與尸義不相近案當爲宰字之譌周禮序官乃立
天官冢宰鄭注宰主也公羊隱元年傳宰者何官也
神重也

神重也郭注神所未詳頤煊案說文身神也詩大明
大任有身毛傳身重也鄭箋重謂懷孕也是以神爲
重也

滕徵虛也

滕微虛也郭注滕微未詳頤煊案說文滕水超涌也
水超涌則其下空虛滕與騰通文選思立賦懲澳湔
而爲清舊注懲騰也懲卽微字

痲病也

痲病也釋文痲祈支反或丁禮反本作疲字書云疲
病也聲類猶以爲痲字頤煊案詩無將大車祗自痲
兮毛傳痲病也白華俾我痲兮毛傳痲病也正義不
引釋詁文爲證疑所見爾雅本亦作疲

倫勞也

倫勞也郭注倫理事務以相約敕亦爲勞頤煊案說
文倫思也玉篇倫思也通作倫說文倫欲知之兒欲

知是思勞也儀禮既夕記倫如朝服鄭注古文倫爲
輪易說卦爲弓輪釋文輪本作倫倫輪古字通用輪
轉則勞故倫亦爲勞也

篲勤也

篲勤也郭注未詳頤煊案說文彗埽竹也重文作篲
左氏昭十七年傳彗所以除舊更新也史記高祖本
紀太公擁篲集解李奇曰如今卒持帚者也孟軻列
傳昭王擁彗先驅索隱彗帚也言爲之埽地埽除亦
勤勞之事故篲爲勤也

治故也

治故也郭注未詳頤煊案尚書盤庚序將治亳殷正

義引束皙說孔子壁中尚書作將始宅殷荀子正論篇治古無肉刑而有象刑治古猶言始古也古卽故也楊倞注治古古之治世也失之

食僞也

食僞也頤煊案僞爲古字通用食字亦兼有二義左氏僖二十八年傳背惠食言成十六年傳瀆齊盟而食話言是以食爲僞也哀元年傳後雖悔之不可食已是以食爲爲也

行言也

行言也郭注今江東通謂語爲行頤煊案左氏哀元年傳因吳太宰以行成服虔注行成求成也管子山

權數篇行者道民之利害也是皆行爲言也

徽止也

徽止也郭注未詳頤煇案文選陸士衡挽歌詩悲風
徽行軌李善注爾雅曰徽止也

廢止也

廢止也釋文唐石經廢作底邵氏正義從宋本亦作
底頤煇案郭注戾底義見詩傳釋上文底字國語曰
戾久將底釋此底字傳寫者誤底作底後人不知底
底義別而以底底爲重出因改一作廢字誤矣

衛嘉也

衛嘉也郭注未詳邵氏正義衛通作偉莊子大宗師

云偉哉造物釋文引向秀云偉美也錢氏大昕荅問
衛通爲禕禕與嘉同訓美故禕亦有嘉義頤煊案一
切經音義卷十蹶古文作衛說文衛衛也故衛與蹶
同訓爲嘉

苦息也

苦息也邵氏正義苦訓爲息於經籍無考王氏引之
經義述聞苦讀與靡監之監同周官鹽人共其苦鹽
杜子春讀苦爲監王事靡盬者王事靡有止息也頤
煊案歟息也釋文孫本作快方言苦快也宋鄭周洛
韓魏之間曰苦自關而西曰快是苦快同爲息也

艾相也

艾相也郭注未詳邵氏正義方言齋歷相也齋艾聲之轉也頤煊案小爾雅廣詁相治也左氏昭九年傳而楚所相也杜預注相治也下文艾治也古通作艾字艾與相同訓治是以艾又爲相也

神治也

神治也郭注未詳頤煊案禮記月令毋發令而待以妨神農之事也孟子滕文公上有爲神農之言者許行神農皆謂治農

允佞也

允佞也郭注允信者佞人似信頤煊案允當是允字之譌允古通作說字以言悅人者卽是佞也荀子脩

身篇饒樂之事則佞兌而不曲卽其證

肇敏也

釋言肇敏也郭注書曰肇牽車牛頤煊案詩江漢肇敏戎功毛傳肇謀敏疾鄭箋今謀女之事乃有敏德是以肇爲敏也肇又通作窈下文窈肆也大戴禮夏小正狸子肇肆肆亦疾也與敏同義

冥幼也

冥幼也郭注幼穉者冥昧頤煊案詩斯干噦噦其冥毛傳冥幼也釋文幼本或作窈正義爾雅亦或作窈孫炎曰冥深闇之窈與郭本異說文冥幽也文選思玄賦歎逝賦李善注引說文冥窈也老子窈兮冥兮

莊子在宥篇至道之精竊竊冥冥素問從容論吾問
子竊冥皆義本於爾雅

適寤也

適寤也郭注相干寤頤煇案釋文孫本適字作午郭
注干常是午字之譌禮記哀公問午其衆以伐有道
釋文引王肅本作迂荀子富國篇午其軍楊倞注午
讀爲迂

檢同也

檢同也頤煇案孟子梁惠王上狗彘食人食而不知
檢漢書食貨志引孟子作而不知斂隸釋任伯嗣碑
姦軌檢手檢卽斂字考工記鳧氏侈弇之所由興弇

謂鍾口狹狹卽斂也故檢弇皆訓爲同

廩廩也

廩廩也釋文孫炎云廩藏穀鮮絜也舍人云廩少鮮也頤煊案孫炎以鮮爲絜舍人以鮮爲少本皆作廩鮮也郭意同於孫炎舍人故注云或說云卽倉廩所未詳引其義未改其字本亦當作鮮公羊文十三年傳羣公廩疏廩者希少之名詩采芣正義引鄭易注嫌讀如羣公濂之濂濂亦是希少之義皆與舍人注合

模模勉也

釋訓模模勉也頤煊案釋訓一篇專爲釋詩而作其

問有不在今詩者蓋三家傳本有異同也悛悛當爲
楚茨君婦莫莫之異文莫與勿字同義禮記禮器勿
勿乎其欲其饗之也鄭注勿勿猶勉勉也故莫莫亦
爲勉也

地謂之黝

釋宮地謂之黝郭注黑飾地也頤煊案黝當作坳莊
子逍遙遊篇覆杯水於坳堂之上釋文崔云堂道謂
之坳司馬云塗地令平說文坳地不平也从土幼聲
地不平謂塗之令平皆義本於爾雅黝坳同聲字

陝而修曲曰樓

陝而修曲曰樓郭注修長也頤煊案此非重屋之樓

說文廡屋麗廡也淮南原道訓運枯形于連嶮列埒之門麗廡連嶮皆卽屋之修長者

兔罟謂之繇

釋器筮罟謂之繇釋文繇本或作毘頤煊案文選張景陽七命張修毘李善注爾雅曰兔罟謂之繇繇或作毘說文毘釣也義與爾雅合說文無繇字

絢謂之救

絢謂之救郭注救絲以爲絢或曰亦冑名邵氏正義郭己或說以絢爲冑未詳頤煊案救通作絛說文絛急也郭注救絲卽急絲也救又通作揀詩大東有揀天畢毛傳揀畢貌畢所以掩兔故或說以絢爲冑也

衣皆謂之襟

衣皆謂之襟郭注交頤頤煊案皆當是前字之譌前說文作苻與皆字形相近釋名釋衣服襟禁也交於前所以禁禦風寒也公羊哀十四年傳反袂拭面涕沾袍何注袍衣前襟也疏袍亦有作衿字者衿與襟同皆是衣前之證

婦人之褱

婦人之褱謂之縞縞綉也郭注卽今之香纓也褱邪交落帶繫于體因名爲褱綉繫也頤煊案後漢書張衡傳李賢注文選思立賦琴賦李善注引爾雅皆作婦人之徽謂之縞三糾繩曰徽字異而音義並同

康謂之蠱

康謂之蠱郭注米皮頤煊案說文糠穀皮也康卽糠字之省蠱與監通詩四牡毛傳監不堅固也左氏昭元年傳穀之飛亦爲蠱皆義本爾雅杜預注穀久積則變飛蟲名曰蠱論衡商蟲篇穀蟲曰蠱望文生義失雅訓矣

滅謂之點

滅謂之點郭注以筆滅字爲點頤煊案禮記曲禮上毋不敬釋文毋字與父母字不同俗本多亂讀者皆朱點毋字以作無音史記梁孝王世家李太后亦私與食宮長及郎中尹霸等士通亂正義張先生舊本

有士字先生疑是衍文又不敢除故以朱大點其字
中心

璧大六寸謂之宣

璧大六寸謂之宣郭注漢書所云瑄玉是也頤煊案
說文無瑄字玉部珣字注醫無閭之珣玕琪周書所
謂夷玉也从玉旬聲一曰玉器讀若宣勺部旬古文
旬汗簡引石經旬作宣字形本相近爾雅宣璧說文
珣玉漢書郊祀志瑄玉詛楚文宣璧皆是一字

縑綬也

縑綬也郭注卽佩玉之組所以連繫瑞玉者因通謂
之縑頤煊案縑本作縑說文縑綬維也後漢輿服志

繹者古佩璲也佩綬相迎受故曰繹釋草藹綬郭注
小草有雜色似綬藹繹同聲字當作繹爲是

革中絕謂之辨

革中絕謂之辨郭注中斷皮也革中辨謂之鞞郭注
復分平也頤煊案辨當作辨說文辨憂也一曰急也
謂皮中斷者謂之急皮中急者謂之鞞說文鞞鞞衣
也鞞如褱積則如今之言縐紋矣說文鞞字承鞞鞞
裏也下此亦當指鞞裏而言玉篇引爾雅作革中絕
謂之辨郭注分平當是分半之譌

徒鼓鐘謂之脩

釋樂徒鼓鍾謂之脩郭注未見義所出頤煊案考工

記鳧氏鍾大而短則其聲疾而短間鍾小而長則其聲舒而遠間脩亦取遠間爲義

四時

釋天四時頤煊案論衡是應篇爾雅釋四時章曰春爲發生夏爲長羸秋爲收成冬爲安寧四氣和爲景星今本爾雅冬爲上天已上爲四時章甘雨時降萬物以嘉謂之醴泉已上爲祥章論衡所引五句在祥章中

疾雷爲霆霓

疾雷爲霆霓郭注雷之急擊者謂霹靂頤煊案霓非疾雷霓當是電字之譌說文霆雷餘聲也電陰陽激

耀也皆疾雷時所有邵氏正義據初學記改作疾雷
謂之霆臧氏琳經義雜記據北堂書鈔事類賦注謂
當作疾雷爲霆余嘗見影宋本北堂書鈔元刻初學
記事類賦注引爾雅皆作疾雷爲霆霓足證近刻皆
俗人所改不足爲據

郊外謂之牧

釋地郊外謂之牧釋文李本牧作田釋云田隰也謂
陳列種穀之處頤煊案田卽周禮四丘爲甸之甸周
禮稍人鄭注甸讀與維禹隰之之隰同今詩作維禹
甸之甸祝鄭注甸之爲言田也小宗伯鄭注甸讀爲
田田卽甸字之省

畢堂牆

釋上畢堂牆郭注今終南山道名畢其邊若堂室之牆詩終南正義引此注云其邊若堂之牆頤煊案邢疏其邊之厓如堂室之牆言平正也釋山山如堂者密郭注形如堂堂者堂下皆有室字

重厓岸

重厓岸郭注兩厓累者爲岸頤煊案上文已釋望厓洒而高岸此不必復釋岸岸當作厓說文厓岸上見也从厂从之省讀若躍岸上見岸卽是重厓厓作岸字形相近并涉下文岸上澣字相連而譌

小山別大山鮮

釋山小山別大山鮮釋文鮮息淺反李云大山少故
曰鮮頤煊案文選吳都賦長笛賦李善注俱引爾雅
曰小山別大山曰嶰嶰古買切呂氏春秋古樂篇伶
倫取竹於嶰谿之谷嶰當作解與鮮字形相近

霍山爲南嶽

霍山爲南嶽郭注在衡陽湘南縣南今在廬江濳縣
西卽天柱山濳水所出也頤煊案風俗通祀典篇衡
山一名霍山左氏襄三年傳楚子重伐吳克鳩茲至
于衡山卽廬江濳縣之霍山杜預注衡山在吳興烏
程縣南失之餘詳見筠軒文鈔第四卷

汧出不流

釋水汧出不流郭注水泉潛出便自停成汚池頤煊
案汧當是汧字之譌左氏隱三年傳潢汧行潦之水
服虔注水不流謂之汧說文洿濁水不流也一切經
音義卷八引三蒼停水曰洿字皆通用

薜山斲

釋草薜山斲釋文斲古芹字頤煊案玉篇薜山芹也
下文斲薜蘆蕪文選吳都賦李善注引爾雅作芹蘆
皆是

茵芝

茵芝頤煊案說文無茵字莊子逍遙遊朝菌不知晦
朔釋文司馬云菌大芝也文選思立賦咀石菌之流

英李善注菌芝也茵當是菌字之譌

其葉遺

其葉遺釋文字又作葭衆家並無此句頤煊案藝文類聚卷八十二引爾雅作其葉葭與釋文所見本同初學記卷二十七引作其葉荷說文艸部菡萏蓮茄荷菴蕩七字連屬荷字注芙蓉葉是說文所見爾雅本亦有此句字作荷與初學記本同

楓攝攝

釋木楓攝攝頤煊案文選南都賦李善注引爾雅楓攝說文楓一名彙文選上林賦張揖注楓攝也皆不重攝字

女桑槁桑

女桑槁桑郭注今俗呼桑樹小而條長者爲女桑樹
頤煊案詩七月猗彼女桑毛傳女桑萑桑也夷古通
作雉字槁桑卽稚桑也詩正義引集注及定本皆云
女桑柔桑取周易枯楊生萑之義萑是葉之新生者
與稚桑同義

蛄螿

釋蟲蛄螿強蛄郭注今米穀中蠹小黑蟲是也建平
人呼爲蛄子頤煊案蛄當作蛄下文蠹蛄斯蛄斯卽
蛄螿因其色黑故又名爲蠹說文蛄斯墨也从虫占
聲卽其證或改蛄螿爲蛄螿非是

鯉鮠

釋魚鯉鮠釋文鯉音禮字又作鯢頤煊案說文鯢鮠
鮠一曰鯢詩魚麗毛傳鯢鮠也說文以鯢釋鯉鮠釋
鯢不應於鯢獨違雅訓疑毛傳說文所見爾雅鮠皆
作鮠與郭氏本異

蝻

蝻郭注未詳邵氏正義闕頤煊案蝻是蝻字之譌
當屬下蝻醜蟾諸句讀說文蝻蝻詹諸玉篇蝻蟾蟾
也皆其證

嶠周

釋鳥嶠周燕燕郭讀法以嶠周句燕燕句注引

詩云燕燕于飛爲證頤煊案詩正義引舍人云舊周
名燕燕又名馵孫炎云別三名也說文雋字注周燕
也呂氏春秋本味篇雋鷲之翠燕字皆屬上句讀

糗牛

釋畜糗牛郭注未詳邵氏正義闕頤煊案糗當作糗
說文犛牛羊無子也从牛壽聲讀若糗糧之糗卽此
牛

河內女子得書

論衡正說篇孝宣皇帝之時河內女子發老屋得逸
易禮尙書各一篇奏之宣帝下示博士然後易禮尙
書各益一篇頤煊案尙書正義引王充論衡後漢史

建安十四年黃門侍郎房宏等說云宣帝本始元年河內女子有壞老子屋得古文泰誓二篇隋書經籍志秦焚書周易獨以卜筮得存惟失說卦二篇後河內女子得之是易益說卦尚書益泰誓皆二篇合爲一篇唐玄度十體書云河內女子壞老君屋得古文二篇乃書之泰誓顧命也尚書視論衡所說多一篇未知何據

駁五經異義

隋書經籍志五經異義十卷後漢太尉祭酒許慎撰不記鄭駁至新唐書藝文志始以鄭駁附於許書頤煊案檀弓正義異義許慎謹案左氏說與禮同鄭氏

不駁則是從左氏之說王制正義許慎謹案禮臣疾
君親問天子有下聘之義從周禮說鄭無駁與許慎
同也郊特牲諸侯不敢祖天子正義鄭氏無駁與許
慎同五經異義鄭亦非逐條駁之

鄭注經音切

漢人注經止爲譬况魏孫炎創反切至宋晉以後音
學始盛後魏書劉芳傳撰鄭玄所注周官儀禮音干
寶所注周官音王肅所注尚書音何休所注公羊音
韋昭所注國語音隋書經籍志釋文序錄載鄭注諸
經俱有音切是後通鄭學者所釋非鄭自注

五經正義用舊疏

尙書舜典正義鞭刑大隋造律方使廢之呂刑正義
大隋開皇之初始除男子宮刑正義上於唐永徽四
年不應稱大隋新唐書藝文志義寧元年置鉅鹿郡
武德元年曰廉州貞觀元年州廢左氏昭十二年正
義昔陽今屬廉州正義上時廉州已廢此皆承用舊
疏之證

漢石經殘碑

後漢書蔡邕傳李賢注洛陽記曰太學在洛城南開
陽門外有石經四部碑凡四十六枚西行尙書周易
公羊傳十六碑存十二碑毀南行禮記十五碑悉崩
壞論語三碑二碑毀頤煊案西行二十八碑南行十

八碑共四十六枚洛陽伽藍記水經穀水注俱作碑
四十八枚八卽六字之譌太平御覽卷五百八十九
引西征記曰太學堂前石碑四十枚亦表裏隸書尙
書周易公羊傳禮記四部四十下當脫六字又不記
論語皆傳寫者譌也西征記又云又太學讚碑一所
漢建武中立時草創未備永建六年詔下三府繕治
有魏文典論六碑今四存二敗北史齊本紀天保元
年八月詔往者文襄皇帝所運蔡邕石經五十二枚
移置國學當兼典論六碑而言

魏三字石經

魏三字石經止尙書春秋左氏傳兩種隋書經籍志

三字石經尙書九卷三字石經尙書五卷三字石經
春秋三卷太平御覽引西征記曰國子堂前列碑
南北行二十五枚刻之表裏書春秋尙書二部大篆
隸科斗三種字碑長八尺今有十八枚存餘皆崩洛
陽伽藍記開陽門外有漢國子學堂堂前有三種字
石經二十五碑表裏刻之寫春秋尙書二部作篆科
斗隸三種字猶有十八碑餘皆殘毀隸續載洛陽蘇
望所刻魏三體石經殘字亦止尙書左氏傳二種

石經拓本

唐六典書學博士以石經說文字林爲耑業石經三
體書限三年頤煊案唐人以三字石經爲蔡邕書故

張參五經文字序例云蔡伯喈以滅學之後經義分散乃請刊定五經備體刻石立于太學之門外謂之石經其所指卽三字石經封氏聞見記論石經云隋開皇六年自鄴載入長安隋亂造立之司用爲柱礎其相承傳拓之本猶存秘府此雖指齊文襄所運之漢石經其實魏三字石經至唐亦未必存凡唐用取士及五經文字郭忠恕汗簡所載皆石經之拓本也

唐石經

封氏聞見記天寶中予在太學與博士諸生共論經籍失正爲欲建議請立大唐石經遷延未發而蕃寇海內文儒道消至今四十六年兵革未息嗚呼石經

之事亦俟河之清也又李陽冰上李大夫書云願刻石作篆備書六經於明堂爲不刊之典號曰大唐石經使百代之後無所損益開成之立石經二君已不及見其論實自二君發之

緯稱秘書

禮記檀弓正義引鄭志張逸問禮注曰書說何時也荅曰尙書緯也當爲注時在文網中嫌引秘書故諸所牽引圖讖皆爲之說云說文易字注引秘書說賊字注秘書曠从戊卽易緯之文

西域字母

隋書經籍志自後漢佛法行於中國又得西域胡書

能以十四字貫一切音文省而義廣謂之婆羅門書
華嚴經有四十二字母般若經有四十一字母一切
經音義釋大般涅槃經云凡有四十七字爲一切字
本其十四字如言三十二字如是合之以成諸字其
法亦起於佛書云

佛書

一切經音義卷六塔字諸書所無唯葛洪字苑云塔
佛堂也華嚴經音義卷下引葛洪字苑云梵淨行亦
字書所無山海經海內經烏氏郭璞注今佛書中有
此人卽烏夷也此皆佛書引用之始西域以音中國
以字自佛書入中國翻譯者隨意創造而俗字始多

矣

讀書叢錄卷九

海洪頤煊

方言

揚雄方言十三卷漢書藝文志及雄本傳俱不載說文解字與方言同者甚多皆不稱揚雄至應劭風俗通序始有方言之稱末附雄及劉歆二書李善文選注引俱作方言亦猶引高誘淮南序稱淮南子蓋唐人引書之例本如此也

蟬出也

卷下蟬出也戴氏震疏證蟬出語之轉故蟬又爲出頤煊案說文出進也與上文蟬續也義相近故蟬又

爲出

雙也

卷二顛鑠盱揚瞻雙也郭璞注此本論雙耦因廣其訓復言目耳頤煊案顛鑠盱揚瞻五字皆是目訓非雙訓注義甚迂雙疑瞽字之譌說文瞽大視也顛通作瞞說文瞞目旁薄緻也也鑠言其目光灼爍後漢書馬援傳矍鑠哉是翁也李賢注東觀記作瞽瞽鑠連文明其義同也文選魏都賦乃盱衡而誥劉淵林注盱舉眉大視也說文揚飛舉也凡言揚眉揚目皆是大視貌玉篇瞻大視也皆與瞽字義近注不得其解而曲爲之辭

散殺也

卷三散殺也頤煊案說文粲字注慙粲散之也从米殺聲粲省作殺故散亦爲殺也

袒飾

卷四袒飾謂之直領郭注婦人初嫁所著上衣頤煊案袒卽禮字禮記喪大記世婦以袒衣正義世婦大夫妻也其上服唯袒衣故婦人初嫁服之

褒明

褒明謂之袍郭注廣雅云褒明長襦也頤煊案爾雅釋言袍繡也禮記玉藻續爲繡緝爲袍釋名釋衣服袍苞也苞內衣也繡通作繭字褒明疑褒繭之譌爾

雅釋訓萌萌在也玉篇引爾雅作藹藹萌萌亦因字
形相近而譌

膊兄也

卷十膊兄也戴氏疏證無注頤煊案周禮醢人鄭注
膊謂脅也說文𠂔部云靡蔽也从人象左右皆蔽形
讀若瞽𠂔部在兒部下兒象人面則𠂔象人脅矣廣
韻十姥作兄此作兄皆傳寫之譌

食閤

食閤從通勸也南楚凡己不欲喜而旁人說之不欲
怒而旁人怒之謂之食閤或謂之從通頤煊案爾雅
釋詁食僞也閤與豔字通食閤謂僞爲豔羨之詞

蟻

卷十一蟬大而黑者謂之蟻頤煊案爾雅釋蟲氓馬
蟻玉篇蟻仕板切馬蟻也皆不名爲蟬唯玉篇蟻昨
仙切方言云鳴蟬也今無此文蟻疑卽螿字之譌

脾止也

卷十二脾止也戴氏疏證脾之爲止不見於書傳頤
煊案儀禮少牢饋食禮脾不升鄭注古文脾皆作脾
釋名釋形體脾臍也在下稱也體與趾連故脾亦有
止義說文脾土藏也土亦有止義

溱將威也

溱將威也戴氏疏證溱今通作湊頤煊案溱當是擗

字之譌擗古拜字將說文作并扶也故皆爲威容

媯媯傷也

媯媯傷也戴氏本傷改作媯頤煊案字當作傷卷十
眠媯欺謾之語也傷卽謾字卷二蹶猶也楚鄭曰爲
或曰婚爲卽媯字

癒解也

癒解也頤煊案癒通作恕孟子萬章上夫公明高以
孝子之心爲不若是恕趙歧注恕無愁之貌無愁卽
解也

荼借也

荼借也郭注荼猶徒也頤煊案徒無借義荼通作賒

子周禮泉府凡賒者鄭司農注賒貫也漢書高帝紀
常從王媼武負貫酒師古曰貫賒也皆是借貸之名
鋼正也

鋼正也頤煊案正當作止易姤繫于金柅釋文廣雅
云止也子夏作鋼蜀才作尼止也廣韻鋼亦作籥說
文籥箝也箝以止物亦義當作止

鼃始也

鼃始也郭注音蛙頤煊案說文鼃蝦蟆也从黽圭聲
淮南說林訓鼓造辟兵壽盡五月之望高誘注鼓造
一曰蝦蟆廣雅釋詁造始也故鼃亦爲始也或云鼃
當作鼃說文鼃詹諸也从黽从尅尅亦聲鼃造同聲

字菴龜亦聲之轉

劉解也

卷十三劉解也頤煊案左氏宣十七年傳庶有豸乎杜預注豸解也正義方言文今方言無豸字疑卽此劉字之譌

蟬毒也

蟬毒也戴氏疏證蟬卽慘聲之轉頤煊案蟬通作單字爾雅釋天太歲在卯曰單闕史記賈生列傳索隱引孫炎本作蟬闕詩天保俾爾單厚毛傳單厚也說文毒厚也故蟬亦爲毒也

還積也

還積也戴氏疏證此義別無可考頤煊案還當是選字之誘說文選迨也迨選也選迨皆有積義漢書楚元王傳雜選衆賢師古曰雜選聚積之貌

鼻始也

鼻始也魯之初生謂之鼻人之初生謂之首頤煊案首當作自說文皇字注自始也自讀若鼻今俗以始生子爲鼻子自部自鼻也據此當作人之初生謂之自與說文義合

桃理也

桃理也郭注謂情理也戴氏疏證正文與注皆別無可考頤煊案桃通作兆廣韻兆說文云分也禮記樂

記樂者通倫理者也鄭注理猶分也兆理同訓爲分故佻又訓理倫理情理其義一也或佻卽𡗗字之譌賦臧也

賦臧也戴氏疏證此義別無可考頤煊案臧古藏字爾雅釋言賦量也量亦有藏義

說文注闕字

盧氏文昭云說文每部下有不解者多書闕字卽本論語闕如之義段氏玉裁云凡言闕者或謂形或謂音或謂義分別讀之頤煊案說文闕字當是徐鉉等校說文時所注非叔重原文西部齏字注闕齏字注闕玉篇多本於說文齏字注齏齏味薄也齏字注齏

舊足證梁時說文潛舊二注尙未闕

說文讀例

說文讀例有三變讀若柔珣讀若宣珣讀若畜牧之畜疇讀若糗糧之煥者釋其音也噤从口集聲讀若集禰从衣蜀聲讀若蜀彙讀若彙麥爲彙之彙窳讀如窳三苗之窳鬻讀若江南謂酢母爲鬻枕讀若告言不正曰枕者訓其義也雀讀與爵同跌讀與跌同者則通其字矣

旁溥也

上部旁溥也頤煊案溥當作薄漢書揚雄傳旁薄羣生太玄中昆侖旁薄荀子榮辱篇薄薄之地不得履

之楊倞注薄讀旁薄廣大之貌性惡篇雜然旁魄而無用文選吳都賦旁魄而論都旁魄猶旁薄也

雲夢之莛

艸部莛菜之美者雲夢之莛从艸豈聲段氏玉裁注廣韻莛菜似蕨生水中說者謂豐水有芑卽此頤煊案說文豈从豆叚省聲爾雅釋草薇垂水郭璞注生於水邊太平御覽引廣志薇葉似萍可蒸食卽此菜與薇山菜別爲一種呂氏春秋本味篇作雲夢之芹皆同聲假借字

平春

荇从艸折聲江夏平春有荇亭菰从艸狐聲江夏平

春有菰亭頤煊案漢書地理志江夏郡無平春後漢書有平春悼王傳郡國志平春侯國屬江夏郡此是東京改置說文所引地理皆是東京初年制

胖廣肉

半部胖半體肉也一曰廣肉段氏注胖之言般也般大也大學心廣體胖其引伸之義也頤煊案周禮腊人薦脯臠胖鄭注鄭司農云臠膾肉杜子春又云臠胖皆謂夾脊肉又云禮家以胖爲半體臠胖同物廣肉當是膾肉之譌

牽立聲

牛部牽引前也从牛象引牛之廩也立聲頤煊案

部遼从夷引而止之也夷者如夷馬之鼻从此與牽
同意出从彡省少財見也古文作𠄎孫愜音職緣切
據此牽字立聲是夷字古文豈非立黃之立

紫識也

此部紫識也从此束聲一曰藏也段氏注廣雅石鍼
謂之紫與識訓相近又紫聳也與藏訓相近聳同舒
卷之卷錢氏大昕荅問以紫卽楚詞些字頤煊案廣
韻指喙也紫同上廣雅釋親紫口也口所以言故曰
識也口所以食故曰藏也

遼復也

是部遼復也段氏注復往來也頤煊案爾雅釋言遼

退也郭璞注外傳曰已復於事而遂今齊語作竣韋
昭注竣退伏也文選東京賦已事而竣薛綜注竣退
也說文退字作復與復字形相似因譌作復

員連

連員連也段氏本改作連負車也注云連卽古文輦
負車者人輓車而行車在後如負也人與車相屬不
絕故引伸爲連屬字頤煊案員物數也物數紛貶卽
爲連屬不絕說文有以假借之字爲本義者此類是
也若連爲負車字當在車部不宜次在此

舖旋促也

言部諫舖旋促也段氏注未聞頤煊案廣雅釋言諫

促也廣韻諫飾也飾卽飾字之譌女部竦謹也从女
束聲讀若謹敕數數史記張蒼列傳媸媸廉謹索隱
小顏云持整之貌飾飭敕古字通用飾旋促卽謹敕
之貌故與上文藹臣盡力之美爲一例

取奐也

奐部奐取奐也頤煊案奐通作喚字左氏宣二年傳
公喉夫縶焉釋文喉使犬也服本作取正義服虔云
取呶也取奐謂意有所使呼之之辭單言之則奐卽
呼也

周書以爲討

支部敲棄也从囂聲周書以爲討詩云無我敲兮頤

煊案周書無討字此五字當在無我毆兮下尙書無
逸民無或胥請張爲幻引之以證毆譎同義討當卽
譎字之譌

敝擊馬也

敝擊馬也从支束聲頤煊案公羊定八年傳臨南駮
馬而由乎孟氏何休注捶馬銜走釋文駮本又作擻
字書無此字相承用之擻卽敝字

六

目部睇目旁薄綴六也自部睇六不見也六部
六交覆深屋也頤煊案目旁薄綴在目之上故六取
交覆爲義睇卽俗所謂眼檐爾雅釋訓目上爲名郭

璞注名眉目之間名卽山聲之轉

目不相聽

睽目不相聽也一本作耳不相聽頤煇案玉篇目部
睽字注目少精耳部睽字注耳不相聽也廣韻引此
二注皆作說文今說文耳部無睽字而以睽字注移
在日部睽字下改作目不相聽又作目不相視皆後
人改併之譌或云睽卽矐字之省玉篇耳部睽矐並
見睽當是說文睽字非省文

蔽兜

眇目傷眇也一曰蔽兜頤煇案兜當作兜兜靡蔽也
从人象左右皆蔽形讀若瞽目眶兩末傷則靡蔽甚

矣見部覲目蔽垢也从見非聲讀若兜卽其證

涓目

映涓目也頤煇案女部缺鼻目間見讀若煙火炗炗
火部焗字注焗焗煙兒涓當作焗焗目謂目間出火
亦目之病也

笑字

竹部笑字注此字本闕臣鉉等案孫愐唐韻引說文
云喜也从竹从犬而不述其義今俗皆從犬李陽冰
刊定說文从竹从天義云竹得風其體天屈如人之
笑頤煇案笑字一本从竹下犬見張參五經文字今
經典相承皆用此字一本从竹从天一切經音義卷

二引作字林非說文一本从竹从大孫愔唐韻所引其時笑字尙未闕當是說文本文

古文脛

食部飪大孰也脛亦古文飪段氏注心部恁下云齋也此古文系後人增孱小徐說李舟切韻不云亦古文飪頤煊案儀禮聘禮記唯羹飪鄭注古文飪作脛禮記郊特牲腥肆爛脛祭鄭注脛孰也恁卽脛字之譌

一曰染也

木部樵酸小棗从木然聲一曰染也段氏注染小徐作柔皆未詳頤煊案樵通作攬字手部攬執也从手

然聲一曰蹂也執義近染蹂卽柔字一切經音義卷十四引通俗文手捏曰撚捏卽染也淮南兵畧訓前後不相撚高誘注撚蹂蹈也與一曰蹂也同

木下白

柳角械也从木卻聲一曰木下白也段氏注未詳頤煊案柳通作隙字白部窠際見之白也禮記曾子問當室之白鄭注當室之白謂西北隅得戶明者也莊子人間世虛室生白崔注白者日光所照也木下白謂木下日光故其字次在杲杳後

上谷鄴縣

邑部鄴周封黃帝之後於鄴也从邑契聲讀若薊上

谷有鄴縣頤煊案漢書地理志上谷郡無鄴縣荀屬
廣陽國後漢郡國志廣陽郡注世祖省并上谷永平
八年復此以薊縣屬上谷當在世祖時

鄴鄉

鄴蜀廣漢鄉也頤煊案此必廣漢郡廣漢縣之鄉也
其時縣或屬蜀郡而不屬廣漢玉篇廣漢上刪蜀字
非是

希字

禾部希疏也从禾希聲徐鍇曰說文無希字錢氏大
昕荅問說文稀希晞皆取希聲明有希字周禮司服
祭社稷五祀則希冕鄭氏讀希爲緝希卽古文緝也

頤煊案豕部豕彘也讀與豨同古文布此卽希字

禾若

秧禾若秧穰也段氏注若卽上文之稔也稔禾皮也
頤煊案今俗謂禾之初生者爲秧非禾皮若當是苗
字之譌玉篇秧禾苗秧穰也字尙不誤

瘕女病也

尸部瘕女病也段氏注女字必是衍字唐初本無女
字頤煊案山海經南山經麗磨之水多沛育佩之無
瘕疾郭璞注瘕蠱病也左氏昭元年傳是謂近女室
疾如蠱則瘕是女病也不宜刪女字

慘好兒

慘好兒段氏注未見其證方言曰慘慙也慙惡也此假慘爲慘也頤煊案慘通作慘字詩葛屨慘慘女手毛傳慘慘猶織織說文作織織好手兒與此訓正同

古文以爲訓字

併送也从人奔聲呂不韋曰有佻氏以伊尹佚女古文以爲訓字頤煊案訓與送義不相近訓當是引字之譌周禮春官瞽矇鄭注無日朕謂之瞽釋文朕本作明朕明同聲訓引又因字形相近而譌

值措也

值措也段氏本改作值持也注云措者置也非其義

頤煊案值本作直通作植論語微子植其杖漢石經
作置其杖尚書金縢植璧秉珪鄭注植古置字值與
置同故說文訓值爲措訓措爲置互相轉注其音義
並同

溺卽澀字

尾部屙人小便也久尾久水頤煊案一切經音義卷
十七引字林屙小便也醫方多作溺字史記范雎列
傳醉更溺睢正義溺古尿字溺卽澀字之譌

髻簪結也

髻部髻簪結也从髻介聲頤煊案廣雅釋詁髻結也
曹憲音義案說文卽籀文髻字也說文本有髻字其

籀文作髻今本髻字在新附中者傳寫脫也儀禮士冠禮將冠者采衣紛鄭注紛結髮今文紛爲結紛卽髻字結卽髻字

圉養豕也

豕部豢以穀圉養豕也頤煊案圉是圉字之譌口部圉廁也从口象豕在口中也一切經音義卷九引蒼頡圉豕所居也字从口豕在其中也漢書五行志豕出圉壞都寵師古曰圉者養豕之牢禮記少儀不食圉腴釋文圉與豢同

騷擾也

馬部騷擾也一日摩馬頤煊案擾當是擾字之譌擾

通作憂字史記屈原列傳離騷者猶離憂也索隱應劭曰離遭也騷憂也又離騷序云離別也騷愁也愁亦憂也皆是古義段氏本刪之非是

𧣾字哲

黑部𧣾雖哲而黑也从黑箴聲古人名𧣾字哲頤煊案史記仲尼弟子列傳曾箴奚容箴皆字哲𧣾當作𧣾箴點皆𧣾字之省

意志也

心部意志也从心音察言而知意也頤煊案此篆并注當是後人增加下文意滿也从心音聲心滿卽爲志不必更有意字說文从意之字多从意可證有意

無意意籀文作意經典通作意字

怵朗也

怵朗也从心由聲詩曰憂心且怵段氏本改朗作脹注云未聞疑是恨也之譌頤煊案今詩鼓鍾作憂心且妯毛傳妯動也手部有扞字國語晉語故不可扞也韋昭注扞動也與毛傳合朗當是扞字之譌

波都也

水部波都也段氏注水都者水所聚也波之證未詳頤煊案爾雅釋水小洲曰隋小階曰沚釋文階字又作渚詩江有渚毛傳渚小洲也水歧成渚歧卽波字異文都卽階字

陵上滴水

沈陵上滴水也。頤煊案後漢書公孫瓚傳滴水陵高。莊子釋文滴結聚也。滴疑溜字之譌。

鯿

魚部鯿藏魚也。南方謂之鮓，北方謂之鯿。从魚差省聲。頤煊案困學紀聞引陸廣微吳地記闔閭思海魚而難於生，致治生魚鹽漬而日乾之，故名爲鯿。讀如想。此卽鯿字之譌，而改變其音。

婦人小物

女部娑婦人小物也。从女，此聲。詩曰：屢舞娑娑。妓婦人小物也。从女，支聲。頤煊案小物當是小弱之譌。姑

字注小弱也。一曰女輕薄善走也。一曰技藝也。皆與娑妓義近。古人妓取歌舞故以俏弱爲能。方言針好也。與此小字義同。

梅目

媚夫妬婦也。从女冒聲。一曰梅目相視也。段氏注梅當作怒。周語道路以目。杜詩用抉眼卽易之反目也。目部眇涓目也。梅目或眇目之譌。又按梅當作侮。謂目相侮也。頤煊案禮記玉藻視容瞿瞿。梅鄭注不審視也。正義梅猶微微謂微昧也。梅目相視謂微目相視。大徐本脫梅目二字。

緊有齒

糸部繁致繪也一曰微識信也有齒頤煊案繁通作
繁字木部柴傳信也周禮司關凡邦國之使節以英
蕩輔之鄭注謂以函器盛此節有齒當是有函之譌
漢書匈奴傳柴戟十師古曰柴戟有衣之戟也有衣
亦謂有函也

塼遏遮也

土部塼遏遮也从土則聲段氏注未詳頤煊案塼當
是塼字之譌禮記玉藻山澤列而不賦鄭注列之言
遮列也漢書昌邑哀王傳迺宮清中李奇曰迺遮也
其字義並同

勃排也

力部勃排也段氏注排者擠也今俗語謂以力旋轉
日勃當用此字頤煊案排當是拂字之譌論語鄉黨
色勃如也色部引作色艷如也孟子公孫丑上曾西
艷然不悅艷然卽勃然勃拂同聲字

鉞

金部鉞車鑿聲也从金戊聲詩曰鑿聲鉞鉞頤煊案
今詩庭燎泮水並作鸞聲噦噦戊與歲聲不相近鉞
當是鐵字之譌文苑英華卷二十九喬潭羣玉山賦
和鑿鉞鐵字卽本此臣鉉等曰今俗作鐵非是

馬頭人爲長

敘諸生競說字解經乃猥曰馬頭人爲長頤煊案長

部高久遠也久兀久匕兀者高遠意也久則變化亡
聲兀者倒亡也今隸書改作長字豈非馬頭人乎史
記萬石君列傳書馬字與尾當五今乃四不足一亦
是隸書馬字

漢魏六朝說文之學

鄭康成考工記注引許叔重說文解字劉淵林吳都
賦注引許氏記字三國志王粲傳注引魏畧云邯鄲
淳又善蒼雅蟲篆許氏字指嚴峻傳少耽學又好說
文魏書江式傳輒求撰集古來文字以說文爲主李
鉉傳鉉以去聖久遠文字多有乖謬於講授之暇遂
覽說文蒼雅刪正六藝經注中謬字名曰字辨趙文

深傳文帝以隸書紕繆命文深與黎明沈遐等依說
文及字林刊定六體成一萬言行於世此書歷代尊
尙未嘗廢絕故至今完存

撰說文年月

許叔重爲郡功曹後舉孝廉辟太尉南閣祭酒後遷
涑長以和帝永元十二年始撰說文至建光元年成
書遣子上之自余據後漢書周澤蔡邕賈逵蔡倫馬
融西南夷等傳攷定於是海內始知有撰說文年月
并官階除授詳見余與孫淵如觀察三書在筠軒文
鈔第一卷

汝南功曹

後漢書許慎傳汝南名陵人也爲郡功曹太平御覽
卷二百六十四引汝南先賢傳許慎爲功曹奉上以
篤義率下以恭寬許冲上說文表稱名陵萬歲里公
乘艸莽臣冲元和姓纂作平與人